

粉鳥

若是愈庄跤的所在，你就愈有機會看著粉鳥仔櫥。用枋仔釘甲嬌嬌，tshāi 佇厝尾頂，頂頭會閣 tshāi 一支紅色的旗仔。無毋著，彼毋是人咧蹠的，毋過有當時仔起甲比人咧蹠的閣甲四序，彼就是粉鳥仔櫥。嘛會使得按呢講，起甲愈好勢的，就是咧比賽的粉鳥插的錢就愈濟。

若是佇駁岸頂頭散步，共粉鳥仔料¹對天頂掖去，就有一大陣粉鳥飛落來，毋驚生份歇佇邊仔食飼料。恬恬倚咧看 in 的跤，攏是無掛跤環(kha-khiân)的粉鳥。In，攏是赤跤仔。

阿煌佇少年時仔，綴人痾粉鳥，數想家己飼的粉鳥會當成做五關鳥²。翼股頭欲予有力，就愛捷操。尾溜有紅旗仔的竹篙，就是操粉鳥上重要的物件，便若訓練時間猶未到，是袂當予粉鳥歇睏。擇佇手裡攢來攢去，若像指揮官訓練一个部隊。攢來，予粉鳥加飛一睏仔；攢去，若向望夢想有達成的一工。

粉鳥仔卵經過十八工，粉鳥仔囡就會當孵出來。對一開始黃色的苦毛仔³，一禮拜了後，毛管空就會發出來較深色的毛，佇這個時陣，就愛決定欲共伊掛啥物款的跤環。上無嘛就愛掛公環仔，會佻一張卡片，彼就是粉鳥的身分證。啊若較好額的，就掛特比仔環⁴，愈貴的，後擺的輸贏就愈大。毋過，若無佇一禮拜內共跤環掛予好，閣來粉鳥的跤爪會傷大，就掛袂起去矣。

無掛跤環的粉鳥，會 hōng 號做「赤跤仔」。赤跤仔無掛跤環、無彼張身分證，就袂當參加公會⁵的比賽。若聽著人咧講「彼隻赤跤仔——」換懸的尾聲，就若親像咧恥笑這隻粉鳥無地位。

阿煌有一隻赤跤仔粉鳥。

因為彼時無注意著跤環對伊的跤爪溜出來，等甲發現著就已經袂赴矣。就按呢，伊變做阿煌粉鳥仔櫥⁶內底上特殊、嘛是唯一的赤跤仔。

飼料掖落去，伊袂和其他的粉鳥相搶食，先恬恬仔看，才對袂傷 kheh 的所在去食；訓練的時陣，攏是伊 tshuā 頭佇咧飛。人出九百箍的價數欲共阿煌買，伊毋甘賣。就按呢，阿煌就共伊號做「九百的」。彼時陣，讀國校仔一學期的註冊費差不多百桶箍爾。

九百的，不管時，領頸攏是倚甲直騰騰⁷，頂頭的毛草發出反光出五花十色的色彩，翼股頂粉色的尾溜有一逝黑色的噴點，一撇翼⁸

¹ 鴿子吃的飼料

² 賽鴿比賽，五次關卡都過關的賽鴿，獎金是非常優渥的

³ 指動物身上剛長出的細毛

⁴ 要參加更高等級的賽鴿，就要掛這種腳環

⁵ 賽鴿協會的簡稱

⁶ 鴿舍

⁷ 直挺挺

⁸ 振翅

才知影翼股會當展遐闊，柑仔色透濫油光的目睷仁，展現出伊和別隻粉鳥無全款的所在。

阿煌是讀較無冊，啊若 in 大兄成績就誠好，大兄讀私立學校，爸母為著無愛偏心，嘛堅持借錢都欲予阿煌讀全款的學校。毋過顧飼粉鳥。成績呔有可能會好咧？

「罰抄 50 遍的課文寫好未？」

「你的成績遮 bái，你敢袂曉共恁大兄小學一下？」

「你是按怎攞考袂及格？」

逐工佇學校就是按呢予老師覷覷唸，你講阿煌敢無想欲成績好？想都咧想，就是無法度。

讀國中的時陣，成績無好，人緣嘛 bái、無啥物朋友，九百的就變做阿煌上好的伴，心事干焦會當揣伊講，毋知影伊聽有抑無？伊恬恬仔歇佇阿煌的肩胛頭，孤單的心有伊共阿煌安搭、有伊佻阿煌做伴。

「這隻母身⁹嬌！」來買粉鳥仔囝轉去做種的，便若看著九百的，絕對攞會揀九百的鳥仔囝。

「毋過母身是赤跤仔……」

「恁娘較好咧，共恁爸死轉去！」拄著白目的講這款話，絕對予阿煌庠轉去。雖罔是赤跤仔，毋過比遐的掛特比仔環的粉鳥閣較出腳¹⁰。

看大人佇列放公會，阮囝仔嘛會綴咧私底下插¹¹。九百的都干焦欠一个跤環，毋過伊尾仔是生一對袂 bái 的種，可惜的是，佇一擺的訓練當中，一隻無去，賭一隻轉來，毋過這隻粉鳥若有種著九百的母身優良的血統，就若人咧講大狗盤牆，細狗趁樣，阿煌就共這隻粉鳥號做 901。

阿煌誠濟的所費，攞是靠九百的和 901 替伊贏的。

「母身攞嘛愛揣外國的才會贏——」

粉鳥仔公會的人，看著阿煌紮粉鳥欲來頓印仔翕相，準備欲參加五關鳥比賽的頭一關。規个比賽的時間換甲閣不止仔長，而且只要其中一關無過，就變做是失格鳥，若按呢，這隻粉鳥就干焦會當坐船種的母身抑是剗剗食食咧準拄煞。而且話閣講倒轉來，若是欲

⁹ 幼鳥的母鳥

¹⁰ 出色

¹¹ 賭

來參加，袂干焦紫一隻爾，對遐的資金無夠粗勇的人來講就無法度矣，閣欲免講是一个苦毛仔¹²都猶未落了的讀國中的囡仔。人問講這隻鳥母身的血統是佗位來的，阿煌嘛是干焦擔肩¹³來代替回答，連伊个仔血統都毋知，都愈毋免講伊的母身有得過啥物款的大獎。

「抑是你欲參加協會私底下插的？」

「贏的錢有濟無？」

看這個囡仔疔，口氣閣袂細。其實檯面跔的賭盤，上適合這的散戶參加，一擺比賽就是一擺的輸贏，時間內飛轉來就有錢通好分，啊若無飛轉來，這隻粉鳥嘛無閣留咧的必要矣。

阿煌共手裡的錢捏甲經經，這是一個月以後欲註冊的錢 3600 箍，若毋是共阿母騙講今年的註冊提早，呒有法度騙著這條錢？敢欲總砦注¹⁴落去？若萬一輸去，無錢通好註冊，就干焦會當偷走厝¹⁵這條路矣。毋過若是干焦砦一寡錢，贏嘛贏無濟，敢欲閣過彼款阿母三不五時就愛去共人借錢的日子咧？，心內愈滾絞，手就共錢捏甲愈經，都捏甲出汗矣。

毋過一想著阿雄 in 爸時常講「拚一斗，若贏就你的矣！」心肝頭敢若較有定著矣。

阿雄 in 兜就是按呢，便若粉鳥比賽的場面，絕對有 in 爸身影的出現，雖罔無逐擺砦注咧跋，毋過伊沓沓仔儉，就是想欲儉甲看有法度去創一隻比利時的粉鳥來做母身無？毋過真正價數上懸，一直攏無法度買會著外國的粉鳥。逐工就干焦靠跋，想愈看手氣的好 bái，按呢一舞落去，干焦予厝裡欠人的錢是愈來愈濟，來 in 都坐咧開講的無濟，來討數的是袂少。

阿煌一想著，自 in 阿爸過身了後，阿母就逐工透早，天都猶未光，就出門去田裡無閒，七點外矣，早點清彩食一下仔，就閣出門坐小工，有當時仔，閣是透中晝去掖肥料，就愛到暗眠摸才會轉來，便若到愛註冊的時陣，就愛去共人向腰借錢，才有法度予兩兄弟仔註冊。

「有讀冊才會有出脫！」阿煌母親一直按呢共 in 教示。

「是欲報名比賽無？」組頭看伊猶咧躊躇，有小可仔無耐煩。

「我閣想看覓咧¹⁶！」錢都已經囡佇桌頂矣，手猶閣押牢牢。

平常時仔一放學，逐家就咧參詳欲去佗位食冰，阿煌就無彼款清閒，就愛佇天暗進前，除了愛飼厝內面的精牲¹⁷以外，猶閣有誠

¹² khóo-m̄ng-á:寒毛。身上剛長出的細毛。

¹³ tann-king: 聳肩

¹⁴ teh-tù: 下注、壓寶。

¹⁵ 翹家

¹⁶ 我再想看看

¹⁷ tsing-senn: 畜生。家禽或家畜。

重要的代誌。

天猶未暗進前，就愛先去菜園仔挽菜葉仔，啊若有當時仔無夠食，就愛去埤仔去撈水雷¹⁸，彼搭位的鬼故事干焦有愈來愈濟，無可能愈來愈少。若毋是姑不而將，精牲無物件好食矣，嘛欲揀這個欲暗仔的時陣來埤仔遮。時常聽大人講，人行佇岸邊就愛特別注意，聽講隨時有手會對埤仔伸出來共人摸落去掠交替。大人其實就是驚阮遮的囡仔走去遐泗水，就共彼个所在講甲誠恐怖，猶閣會講別庄的佗一个囡仔就是暗呢無去的，若欲證明講伊無佇咧講嘍滿話。所以便若去到遐，就攞會感覺誠驚。

轉來才閣共水雷切予幼，才閣攪米糠，彼就是精牲仔上腥臊的暗頓。

共精牲仔安搭好勢了後，就愛那燃燒水那訓練粉鳥，peh 起去水塔頂共粉鳥仔門拍開，幾若十隻的粉鳥就攞衝出來，就愛捷訓練，粉鳥才會 gâu 飛、翼股才會硬。

粉鳥飛無幾輾，就會想欲歇睏，這時陣就愛共紅色的旗子提出來，大下共伊攆落去，粉鳥才會閣共翼股展開，繼續飛落去，加飛幾輾仔，比賽的時陣就若較有把握矣。看著九百的、901 做頭王飛佇頭前，若像阿兵哥排規列通過阿煌的頭殼頂。

天欲暗矣，紅色的旗仔園落來，就若像咧宣布歇睏的時間到矣。粉鳥翼股收束起來，一隻一隻停落來粉鳥仔櫥頂頭。阿煌早就共粉鳥櫥內面的飼料園予好矣，枵閣喙焦的粉鳥就趕緊對鐵仔做的自動門，隨个隨个跳入去內面，開始搶食 in 的暗頓。

無閒煞，阿煌就一个人坐佇戶櫥頂頭、下頰挺咧，等待去掘甘蔗頭的阿母轉來，外口是暗眠摸啥物攞看無，阿母講若遮的精牲仔大隻了，就會當賣，會當加減還寡數，這的錢攞是借來予 in 兩個兄弟讀冊的。

「幾隻雞鴨會當賣佻濟錢？」阿煌心內按呢想。

佇戶櫥頂頭，共目睷瞞咧，心肝內想的就愈清楚矣。若是 901 會當順利對瑞芳踎時間內飛倒轉來，就有獎金，若按呢阿母是毋是就毋免向腰共米絞吳借錢咧？啊彼領補甲若蜘蛛絲的褲，敢毋是就會當買新的？猶閣有彼台時常落鏈仔的跂踏車敢毋是就會當換一台？烏暗中的想像，若看會著一張一張的銀票綴 901 飛入來厝裡，一鍾¹⁹一鍾疊起來，阿母的笑容若揣轉來矣，啊過身去的阿爸嘛若閣轉來矣，袂輸若所有的一切攞變好矣。

「你是欲插無？」協會的人共伊的手徙開，阿煌趑轉來現實的世

¹⁸ 布袋蓮

¹⁹ thōng:計算重疊堆積物的單位。

界裡。

「好啦!」3600 箍收過去，換來一張收據，算做是比賽的一個會當信任的比賽證明。

「干焦一隻粉鳥也想欲插?」協會的人細聲仔偷笑，共 901 交予協會人員，囥入去關粉鳥仔的籠仔底，行出協會，雄雄煞感覺有一種講袂出來的失落感。

「彼个阿煌都變歹囥矣，和人放粉鳥，才會……」阿煌若親像想著伊若無贏，就愛偷走厝，袂輸若這馬就聽會著人佇咧尻川後講的彼个閒仔話。

閣再過兩工，粉鳥就會對放飛出來，這馬就干焦賭等待爾。

禮拜時仔的早時仔，有參加這場比賽，其實就是有掛插的人，就倚佇粉鳥櫥頭前，等帶對瑞芳飛轉來的粉鳥。看起來是誠簡單的路途當中，有真濟咧共人偷網粉鳥的集團，已經佇粉鳥咧飛轉來的路途當中，設下天羅地網佇大水窟仔的四箍輾轉，只要粉鳥喙焦想欲飛落來食水，咧欲到水面的時陣，才磅炮仔予粉鳥驚著就閣隨起飛，生驚²⁰飛起來的懸度，拄好合拄合遐的偷網鳥仔的人掛的網的懸度。啊若按呢，比賽的時間未到，你就會接著電話叫你愛匯錢予 in，欲毋在你，錢匯出去，粉鳥仔猶有可能共你放轉來，只是轉來的粉鳥仔，你就會發現 in 的翼股攏有予網仔傷著的痕跡。啊若毋匯錢去，你就共粉鳥提去烘鳥仔巴。啊 in 呾會知影電話?比賽掛的跤環頂頭攏嘛有!

阿煌一个人守著厝尾頂的粉鳥仔櫥，厝內底啊無電話，粉鳥若予人網去就準拄煞矣，這馬干焦向望會伊當佇時間內飛轉來。若是無飛轉來，彼條註冊錢就無矣，若按呢就干焦會當偷走厝爾。

咧欲十一點，嘛差不多是粉鳥愛轉來矣的時陣，也就是決生死的階段到矣。若是這時陣飛轉來，閣按怎 bái 獎金上少嘛有十幾萬，毋過若超過下晡一點，901 就會變做失格鳥，想著 3600 元就會予人咬去，心肝頭必撲跳，面嘛開始紅絳絳。

鬱熱的天頂，賭幾塊仔白雲佇頂頭，連振動都懶屍²¹振動。遠遠的黑點，佇阿煌的目睷仁頂頭沓沓仔變大，本底猶閣嘻嘻嘩嘩，因為彼个黑點，予逐家目睷攏褌大蕊，金金仔相對遐，一下仔倚過來的款，一下仔閣覷對別位去，予逐家誠緊張。

「是 901!」

除了是看伊翼股挾翼的方式，猶閣有平常時仔的搭峇²²，予阿煌確定是伊的粉鳥仔轉來矣。

看一下仔手表，「11:19」

²⁰ tshenn-kiann:驚嚇。

²¹ lán-si:懶洋洋。懶惰。

²² tah-bā:默契

901 誠緊就對自動門入去鳥仔櫥內面，阿煌共伊的正跤掠起來對鴿鐘一伸過去，喀一聲，「11:21」時間無延延著。閣來就愛緊佇半點鐘內，共粉鳥仔送去民雄協會。

隨跳起去跔踏車頂頭，拚勢踏跔踏仔，讀冊都猶無遮認真咧，那喝那騎，袂輸若按呢才會當表達出伊心內的激動，凡勢是喝了傷大聲，目屎煞對目箍頂頭輾落來。伊嘛是一直喝一直喝，佇彼个欲晝仔的田路頂頭、佇彼个一直想欲趁大錢的夢想當中。阿母毋免閣去共人借錢，厝內面會當較好過矣，毋知是按怎，聲一直喝，目屎嘛煞直直輾。

「就是干焦插一隻粉鳥的彼个猴囡仔！」阿煌這馬煞便坐上顯目的人、佇協會另外一个房間的辦公桌仔邊。

「彼隻的母身可能是比利時的！」

「伊干焦一隻爾²³，就得獎矣！」

「袂少錢喔！」

園佇手掂掂咧，彼包錢閣小可仔掂篤²⁴，行出協會，後頭綴幾個仔穿黑衫的人。毋過猶閣當咧歡喜贏筊的人，呷會可能去注意邊仔的代誌？都攞會感覺邊仔的人嘛是佇咧替伊歡喜，啊若是目睷佇咧共你降²⁵，彼就是佇咧 怨妒你才會按呢。

「阮大的有代誌欲揣你！」穿黑衫的人跔步猛掠行來到阿煌的邊仔，那講那共伊的腋下空²⁶插咧，半挨推²⁷坐起去 oo-tóo-bái 頂，前後兩個人挾牢咧，無佬久就來到四邊攞是田，就干焦這個工寮的所在。

裡面除了農藥味，猶有囤寡尿素、鉀氣的肥料，賭的就干焦略仔澹濕的稻草發出的臭殍味。

「你欲愛錢抑是跔手咧？」一个肥胸胸²⁸、褪腹楊²⁹，身軀頂刺一副麻雀子仔，凡勢是肉傷濟，規个圖樣不答不七³⁰，坦敲坐佇椅仔頂的老大的佇遐。檳榔哺甲喙齒紅記記，咬一支薰閣不時提佇手裡弄一下，椅仔跔攞是薰屎恰薰頭仔、檳榔汁。兩肢手不時就共桌頂彼支刀仔提起來弄弄咧。五、六分鐘，才講九个字的話。彼袋贏來的錢對從阿煌的身軀頂，予人搶過來園佇桌仔頂的倒手片，正手片就園一支西瓜刀。四箍輾轉攞是挂佈落去無佬久的秧仔，連半个

²³ 他只有一隻鴿子參賽而已

²⁴ tīm-táu:沉重。沉甸甸的。

²⁵ kàng: 生氣地瞪人。

²⁶ koh-ē-khang:腋下、腋窩。

²⁷ puànn-e-the:半推半就

²⁸ puì-tsut-tsut:胖嘟嘟。

²⁹ thng-pak-theh:打赤膊。光著上身。

³⁰ put-tap-put-tshit:不三不四、不像樣。

作穡人都無，想欲走？就愛走會贏這三、四个竹雞仔³¹，猶閣有外口兩個看頭³²的。

佇工寮內底，看倚佇大箍大的邊仔的細漢的，毋是佇遐警姦搦橋³³，就是佇遐喙那哺檳榔手閣提一支薰，會當講是攏是青面獠牙的款，就干焦有一个看著烏焦瘦³⁴、倚佇上邊仔頭犁犁，無像其他遐的竹雞仔彼款的聳鬚，斟酌看閣若小可仔面熟，毋過雄雄想袂出是佇佗位看過。

「阿恩，平常時仔，你是上粗殘、上敢的，啊你這馬覘咧後壁是咧驚啥湍³⁵？」

阿恩？莫怪有淡薄仔面熟閣有淡薄仔生份！彼就愛對阿煌國校六年仔的時陣來講起。

「這是咱班上新轉來的同學阿恩，逐家愛好好仔恰伊鬥陣！」

都賭幾個月仔就欲畢業矣，逐家誠好玄阿恩的背景，毋過老師叫伊介紹家己的時陣，伊都干焦手捏甲經經、喙脣皮咬牢牢，連一句話都講袂出來。

「伊是阿美族的原住民，較閉思，逐家會當沓沓仔了解伊，這馬先轉去坐予好！」

「哈哈，就是番仔啦！」當阿恩行落去的時陣，彼个上孽湍³⁶的老身就按呢喝，規个班隨攏笑出來。

「袂使得叫人番仔！」老師想欲阻擋老身袂當按呢講，毋過規个班嘻嘻嘩嘩³⁷，老師的話就若一陣風全款，一透過就無人感覺有存在過，阿恩面頭結結，心情誠bái，毋過老師無注意著，就開始上社會課。

「法國大革命的三大口號就是自由、平等、博愛……」

「共這句畫線畫起來，這考試會考喔，誠重要！」

老師講甲喙角全泡³⁸，阿煌越頭看後壁，都干焦看著無課本的阿恩戇戇看烏枋，啊老身咧？就干焦向阿恩的方向，細聲仔喝「番仔——番仔——」

一下課，老師轉去辦公室，老身就愈好膽矣。倚起去桌仔頂，大聲喝「番仔——番仔——」。

老身佇班上，若講讀冊是無半撇，予老師罰倚的時陣比坐佇椅仔頂的時間閣較長，共查某囡仔掀裙、共查埔的捏lân-pha，佗一項代誌伊毋捌做過？老師逐工損嘛是無效，毋過看伊遮翳俳，逐家嘛

³¹ tik-ke-á: 小流氓。

³² khuann-thâu: 把風。

³³ 狂罵三字經

³⁴ oo-ta-sán: 人長得皮膚黑又枯瘦的樣子。

³⁵ kiann siánn-siáu: 怕什麼。(較粗俗不雅)。

³⁶ giát-siáu: 頑皮、作孽。

³⁷ hi-hi-huā-huā: 嬉鬧、喧嘩。

³⁸ tshui-kak tsuân pho: 口沫橫飛

攏毋感按怎。

毋過老身今仔日是有較過份，阿恩嘛袂堪得伊按呢起無空³⁹，就衝過去和老身相拍起來，毋過烏焦瘦的阿恩倚咧都猶未到老身的領頸，忖有可能是老身的對手？看著就已經知影結果的一場摔拚，雄雄聽著老身哀一聲，伊的領頸予阿煌纏牢咧，干焦會當踎遐哀哀叫。

「閣囍俳啊！」

「叫阿公！」領頸予人纏牢咧，老身只好細聲叫一聲阿公。

「較大聲咧——」

「阿公！」就佇老身大聲共阿煌叫阿公的時陣，予人纏牢的領頸才放開，圍佇遐看鬧熱的同學嘛攏大聲笑出來，想袂到老身會有今仔日。凡勢是領仔頸予人纏一下傷疼，老身煞大聲吼出來，閣隨走去揣老師，投講阿煌和阿恩做伙共伊拍。

「人共你罵，你嘛袂當起跤動手，按呢動手共人拍就毋著矣！」老師共 in 兩個叫過來損三下了後，就和老身做伙佇後壁罰倚。

「阿恩，明仔載叫你阿爸來學校！」

「我無老爸！」阿恩干焦擔肩⁴⁰，無閣加講啥物。

「啊恁阿母咧？」面對老師的問題，阿恩頭犁犁若無想欲閣回答啥物矣。

「老師，老身袂當共阿恩叫番仔——」阿煌替阿恩贊聲。

「人叫伊番仔，伊就會使得拍人——hioh?無度量！」老師愈講愈謙。

「老師，啊人若共你叫番仔咧——」阿煌心內嘛是有話無講會有內傷，毋過伊都猶未講了，老師就氣甲共伊喙賴摠⁴¹落去。彼一下閣袂講蓋細下，阿煌疼甲哭出來，阿恩隨倚過來擋佇老師的頭前。

「老師，我袂番——」

阿恩講甲誠清楚，眼神誠堅定，老師看一下嘛若略仔有膽著，退兩步，差一點仔就摔落去。

「好——矣，攏——轉去——坐予好！」聽會出來老師的聲必必掣。

自彼遍開始，無人閣叫阿恩是番仔。阿恩和阿煌嘛變做上好的朋友，毋過無佸久就畢業矣，聽講阿恩閣搬轉去臺北矣，兩個人就失去聯絡。

閣再見著面，都已經是三冬後的工寮仔內底。

「當然嘛是欲愛跤手！」聽著阿煌按呢回答，逐家煞攏同齊笑出來。大箍大的佇桌仔邊加行幾步仔路。

「誠好，你會當走矣！」嘛是過一睏仔才講出來。

³⁹ khī-bô-khang:挑釁、找碴。

⁴¹ sai:打耳光。

⁴⁰ tann-king:聳肩

毋甘願啊!這袋錢會當改變若濟代誌，甚至是規家伙仔的命運，就按呢白白送予遮的毋成团、這幾個術仔?想著阿母就愛閣透早出門，暗暗才會當轉來，換跔踏車的願望閣毋去矣，啊 901 拍拚展開翼股，認真衝轉來，閣是為著啥物咧?真正毋甘願啊!

一件若綁票、恐喝提錢的代誌，袂輸若按呢就結束矣。

「幹!」

原底已經越頭欲走矣，雄雄共跔步擋恬，頭轉躉過 in 老大的彼片。彼个大箍大的雄雄予人驚⁴²，有小可仔掣一趙霎躉神去，過一睷仔，再回頭神轉來，邊仔的細漢就向前，手夯懸準備欲揍阿煌。

「擋咧!」阿恩倚出來講話。頭越過來大的遮，「大的，先予伊講了，看按怎才予伊好看!」

「好!」大箍大的喙那講手那比咧。

大箍大的看著有小可仔心狂火著矣，毋過若為著欲表現出做大的款，就先壓抑伊咧欲爆發的性地。一切就攞若阿煌所掠譜⁴³著的全款，大箍大的會先予伊共化講煞，按呢一來，代誌就有可能有轉躉的機會矣。

「恁無臭無湍⁴⁴!」阿煌愈講愈激動，錢若按呢就毋去，嘛是全款無錢通好註冊，最後嘛是愛偷走厝，盡拚就拚一抖，就無咧管待伊，凡勢都無啥物通好損失，膽就較大，話嘛較敢講矣。

「你敢共恁爸⁴⁵按呢搞?」

大箍大的氣甲共刀仔擲對邊仔去，差一點仔就擲著一个細漢的。

「恁娘較好咧，連本錢都欲共我咬去，真正是無臭無湍!」

阿煌話喝甲聲攞必叉去矣。一喝落去，逐家煞恬靜落來一睷仔，就干焦賸阿煌的喘氣聲攞甲規厝間。

「抑無你的本錢是佹濟?」

「6000!」阿煌的話隨接咧大箍大的的尾聲。

大箍大的看著阿煌的眼神，袂輸若看著伊較早出來行踏的時陣，家己老大的模樣，煞有小可仔膽膽⁴⁶。

「予伊!」想著江湖咧行，嘛袂當做叫傷過頭去。

大箍大的隨叫阿恩算 60 張一百箍的紙票予阿煌，其實阿煌嘛真正想袂到代誌會有按呢的轉躉，毋過伊知影愛鎮靜定著咧，若無，錢可能就會無去。

沓沓仔行，嘛足驚後壁雄雄有刀仔會刺過來。行出來到田岸頂，確定後壁無綴人，在放心仔共速度放緊，到大條路才用走的。

⁴² tshoh:用粗鄙的話罵人。

⁴³ liáh-phóo:猜取大意、猜測。

⁴⁴ 罵人不守江湖道義的粗話

⁴⁵ 是自稱的意思。

⁴⁶ tám-tám:怕怕的。

嘛毋知走佬久矣，揣著家己的跣踏車，先共錢攬佇褲頭較袂落去，才緊的那騎那喝咻，喝出逃離大箍大的手掌中的平安，若學著 901 挾翼衝轉來的彼款屈勢⁴⁷，嘛咧替 901 喝出上大的贊聲。

啊忒毋去報警？私底下插粉鳥，彼攞是違法的，屬於跋筴的行為，你敢有看過人跋輪筴去報警的？

「就當做這擺的獎金是 2400 箍！」一想著有這條錢，會當註冊，啊若所費就毋免閣共阿母偷提錢矣。只是伊想無的是，彼敢是阿恩？阿恩忒會佇遐咧？

去西裝店訂做一領喇叭褲，閣買一台新的跣踏車，都猶開無一千箍咧。

「你最近若較無欠錢--hioh？」阿母共阿煌問著這項代誌，因為平常時仔，阿煌都攞猶會討錢咧，這站仔煞恬恬。

「彼台跣踏車是我領獎學金買的！」

「這領褲嘛是！」阿煌講著頭犁犁。

阿母竟然沒懷疑，從來毋捌提過獎狀轉來的阿煌，這馬嘛會當領獎學金？

「想袂到阮囡閣遮 gâu！」

「錢愛較儉咧開咧！」阿煌全款頭犁犁聽阿母講話。

雖然厝裡共人借錢予伊去讀私立的學校，毋過顧痾粉鳥，所以省嘉中就考袂牢，只好去讀高職的學校，粉鳥嘛全款照飼，毋過就較無法度操粉鳥，因為轉來到厝都已經欲暗矣，干焦會當禮拜時仔才放出來飛飛咧。

彼年年兜仔遐，阿煌佇火車頭拄著阿恩，一个欲南下去台南補習重考二專，一个上北欲轉去木柵 in 阿母蹠的厝。一講落去確定工寮內底的阿恩真正是阿煌的好朋友。

「恁絕對攞毋知影，我是按怎會轉轉來庄跣的？」阿恩的話，講得誠慢，就若親像彼工慢分⁴⁸的火車沓沓仔來。伊講起伊的老爸本底是佇花蓮做搬運工，共人做擔保，結果人煞走無去，留落來的債務當然 in 阿爸愛承當，尾仔干焦會當走路，規家伙仔就走來臺北木柵，彼當陣阿恩才國校二年的爾，經予債主揣著，就毋敢予阿恩去讀冊，兩冬後 in 阿爸閣莫名其妙無去矣，揣嘛揣無人。一直到阿恩國校欲畢業的年紀矣，公所的人來查戶口，才知影伊攞無去讀冊的代誌，就叫 in 會當去庄跣揣一間仔學校寄學籍，凡勢就會當提著畢業證書，就按呢才會轉來庄跣外媽遮。

「你敢猶會記得彼个大箍大的？」

「你忒欲和彼款人鬥陣？」

⁴⁷ khut-sè:姿勢

⁴⁸ 誤點。通常指班機、班車遲到。

「字，我啊捌無幾字，是會當做啥？」

阿恩講起和大籐大的熟似的經過，國中的讀無幾工，就去予人笑講番仔囡，尾仔是大籐大的予伊倚靠，才袂予人欺負。大籐大的嘛是原住民，所以特別照顧阿恩。啊 in 這群的，平常時仔就靠顧酒家、茶店仔過生活，啊若拄著粉鳥仔比賽，就專門相這款私底下咧插的猴囡仔。

「若知影是你，早就會叫你走矣！」所以彼工佇工寮內底的阿恩真正是伊。

「本底有幾個仔細漢的，想欲共你的 6000 籐烏食烏搶轉來，是我共 in 擋咧——」

「我一直會記得你替我修理老身的代誌！」

「伊閣共我叫阿公咧！」阿煌雄雄想起彼工的代誌，兩個人做伙笑出來。

「這馬敢猶有咧飼粉鳥？」阿煌予阿恩按呢問落去，煞恬靜一睷仔。

自欲去臺南補習重考，就無法度閣飼矣，當然嘛毋甘共 in 賣予人做肉鳥⁴⁹，就決定放空櫥，共賸落來的粉鳥仔料和門攏拍開。沓沓仔，粉鳥就愈來愈少矣，上尾離開的就是九百的。粉鳥仔櫥欲拆的時陣，看著伊歇佇厝頂恰阿煌金金仔相。共粉鳥料囡佇手裡，呼一下噓仔，伊就閣飛過來食了，阿煌攞手閣講一聲再會，伊嘛若聽有的款，飛走去就毋捌閣飛倒轉來矣。

「這馬無飼矣啦！」

稀微的尾聲，若講出無法度閣再飼粉鳥的無奈，嘛若說出對九百的 in 彼群粉鳥的懷念。若是無遮的粉鳥，敢猶有法度拄著過去的好朋友，猶閣是佇彼款的工寮仔咧？人生，是毋是有太濟的無法度料想恰拍算咧？

當想欲共阿恩問講這馬咧食啥物頭路，伊上北的火車就來矣，看伊寬寬仔行入去車廂，看伊嘛是全款毋甘的眼神，這個再會，敢閣有真正會當見著面的時陣？火車愈駛愈遠，變做一個烏點才閣消失佇目睷底。若是十冬、二十冬閣再見面的時陣，敢猶會認得？閣會佇啥物所在咧？

⁴⁹ 殺來吃的鳥